

gel verruckte / daß man es fleißig wider in das gemacht Pünctli
legen / demnach nimb das Instrument von dem Stecken vnd den
Stecken ouch / vnd steck ein anderen an das ort / vnd gang zu dem
anderen stecken oder stand / vnd zeuch ihn auß / vnd steck den steckē
mit dem Stefft fest dareyn / vnd straub das Instrument darauff
fein eben / vnd ruck die standregel mit dem Buchstaben C. gegen
dem ersten stand / denn strube das Instrument vest / das es sich nit
verruck / demnach hast du gemassen von einem stand von dem an-
deren / vnd hast funden 60. schuch / die weyl du von dem ersten ge-
gen der lincken hand zu dem anderen stand gangen bist / so must du
die Regel mit dem absähen ouch in die standregel legen zwüsched
dem B. vnd A. vnd zell von dem A. gegen dem B. 60. puncten / vnd
leg die regel mit dē absähen dareyn / vñ lug wider an dz ort das du
begerst zu wüssen wie weyt es ist / so lug auff der Regel wo es sich
abschnyd / was für ein zahl ist / so findest du auff der regel zwüsched
A. vnd D. 125. puncten / so ist von dem ersten stand / 125. schuch da-
hin / vnd findest auff der Regel mit dem absähen 134. puncten / so ist
von dem anderen stand 134. Schuch.

Ein ander Exempel.

Strub das Instrument wider auff den stecken wie du ihm vor
ouch gethon hast / vnd ruck die Standregel / so mit dem buch-
staben A. B. C. verzeichnet ist nach einem Standt / gilt gleych wo
hin nach deiner gelegenheit / da es im künftichsten sein mag / da
stech ein stecken / vnd miß von dem ersten stand gegen dem steckē /
oder gemerck so du gemacht hast / wie vil schuch oder schritt / stadt
zu deinem gefallen / Exempel. Du hast von dem ersten Stand ge-
gen der lincken hand gemassen vnd funden 200. schuch / wie in der
Figur auffgerissen vñ mit dem buchstaben A. B. C. verzeichnet ist.
Demnach mach das Instrument vest / daß es sich nit mehr ver-
ruck / demnach ruck die beweglich Regel so mit dem buchstaben D.